

## Press Clipping

# Westports jadi pemeriksa logistik pusat halal

**KUALA LUMPUR** 8 Mei - Westports Malaysia, pelabuhan terkemuka negara dan bertaraf dunia, berhasrat memainkan peranan sebagai pemeriksa logistik bagi membantu mencapai wawasan negara untuk menjadi pusat halal global.

Ini memandangkan kedudukannya yang terletak dalam kawasan sekitar Pusat Halal Selangor dan pembangunan pusat halal yang kini mula menampakkan kewujudannya di Zon Bebas Pelabuhan Klang Port Klang (PKFZ), kata Westports dalam satu kenyataan hari ini.

Kedua-dua kemudahan di Pulau Indah, yang merupakan lokasi Westports itu, menandakan perkembangan penting dalam usaha menjadikan negara ini pusat bagi pengeluaran dan pengeksportan produk halal.

Westports yang sudahpun bersedia me-

**Kedua-dua kemudahan di Pulau Indah, yang merupakan lokasi Westports itu, menandakan perkembangan penting dalam usaha menjadikan negara ini pusat bagi pengeluaran dan pengeksportan produk halal**

mainkan peranannya sebagai pemeriksa logistik itu berkata ia telah memulakan promosi untuk memikat bakal pelabur dari China supaya datang ke Pelabuhan Klang.

Menurut pelabuhan itu, pusat halal di PKFZ serta kadar produktiviti Westports yang mengagumkan itu telah menarik perhatian masyarakat perniagaan China semasa lawatan rombongan perkapalannya

ke Shanghai dan Shenzhen baru-baru ini.

Katanya, umat Islam di China mengagap pembangunan pusat halal di PKFZ dan Westports sebagai tapak pelancaran bagi produk mereka.

"Potensi pertumbuhan pasaran makanan halal amat besar dan pelabur-pelabur China sedang mencari peluang untuk mengeluarkan makanan sedemikian dan me-

nembusi pasaran negara-negara yang tidak dapat mereka masuki sejak sekian lama," kata Westports.

Forum Halal Dunia di Kuala Lumpur dari 8 hingga 10 Mei ini dijangka menentukan hala tuju industri halal dunia yang dianggarkan bernilai AS\$500 juta (RM1.89 bilion) hingga AS\$2.3 trilion (RM8.28 trilion).

Dengan sokongan daripada Kementerian Pengangkutan, kedua-dua Westports dan PKFZ akan menganjurkan lebih banyak pameran jelajah dalam bulan-bulan yang akan datang untuk menarik lebih banyak syarikat perkapalan dan pelabur ke Pelabuhan Klang, khususnya untuk memperkenalkan ciri-ciri unik hub halalnya.

Destinasi-destinasi yang telah di kenal pasti bagi pameran jelajah itu ialah Dubai, Chennai, Colombo, Bangladesh, Myanmar dan Indonesia.